

AIA PUBLIC Takaful sedia RM1.6 juta lancar Program Biasiswa Penyala Harapan

Kuala Lumpur: AIA PUBLIC Takaful Bhd melancarkan Program Biasiswa AIA Penyala Harapan, satu inisiatif bagi memperkasa pelajar Malaysia berpotensi tinggi menerusi akses kepada pendidikan tinggi.

Program biasiswa itu direalisasikan hasil sumbangan lebihan takaful peserta sijil AIA PUBLIC Takaful yang disalurkan secara kolektif ke dalam Tabung Amal AIA Penyala Harapan, dana khas yang ditubuhkan untuk menyokong usaha kebajikan dan kesejahteraan komuniti di seluruh negara.

Dilaksanakan dengan kerjasama Universiti Islam Antarabangsa Malaysia (UIAM) melalui Bahagian Tabung Wakaf UIAM atau IIUM Endowment Fund (IEF), biasiswa berkenaan terbuka kepada pelajar tahun pertama ijazah sarjana muda dalam bidang Perbankan Islam, Kewangan Islam dan Undang-Undang.

Sebanyak RM1.6 juta diperuntukkan bagi menyokong 20 penerima biasiswa kohort pertama, merangkumi yuran pengajian dan kos sara hidup sepanjang tempoh pengajian sehingga empat tahun.

Penerima biasiswa turut berpeluang menjalani latihan industri bersama AIA PUBLIC Takaful, tertakluk kepada pemenuhan syarat akademik dan program.

Ketua Pegawai Eksekutif AIA PUBLIC Takaful, Mohd Asri Omar, berkata pendidikan adalah antara kaedah terbaik untuk membantu masyarakat menjalani kehidupan yang lebih sihat, berpanjangan dan bermakna.

Bentuk pelajar berwawasan

"Program biasiswa ini adalah inisiatif pertama yang direalisasikan melalui Tabung Amal AIA Penyala Harapan. Dengan UIAM sebagai rakan universiti, kami komited membentuk pelajar yang berwawasan dan memperkasa mereka untuk membina masa depan yang memberi impak positif kepada diri, keluarga serta komuniti," katanya dalam kenyataan.

Beliau berkata, inisiatif itu turut mencerminkan proposisi unik AIA PUBLIC Takaful berasaskan Penyelesaian Syariah Menyeluruh yang berlandaskan prinsip Maqasid Syariah, di mana takaful bukan sekadar perlindungan tetapi membawa nilai

kebersamaan dan keberkatan.

"Melalui tonggak Berkas Sama-Sama, pelanggan berpeluang mendermakan lebihan takaful mereka untuk kesejahteraan masyarakat. Kami amat menghargai kepercayaan pelanggan yang menjadikan inisiatif ini satu realiti," katanya.

Menurutnya, matlamat jangka panjang AIA PUBLIC Takaful adalah untuk membina ekosistem biasiswa yang mampan bagi mengangkat dan memberi inspirasi kepada generasi muda melalui kuasa pendidikan.

UIAM dipilih sebagai rakan strategik berikutan reputasi akademiknya yang kukuh serta peranannya sebagai universiti Islam terkemuka di Malaysia dan di peringkat global, sejajar dengan nilai pembangunan beretika dan berasaskan prinsip Syariah yang dikongsi bersama AIA PUBLIC Takaful.

Timbalan Rektor Pembangunan Pelajar dan Penglibatan Komuniti UIAM, Prof Datuk Dr Mohamad Fauzan Noordin, berkata kerjasama itu selari dengan komitmen universiti dalam melahirkan graduan holistik yang menggabungkan kecemerlangan



Mohd Asri (kiri) dan Mohamad Fauzan bersama replika cek RM1.6 juta yang diperuntukkan kepada 20 penerima biasiswa kohort pertama.

akademik dan nilai etika.

"Biasiswa ini akan membantu pelajar mencapai potensi sepenuhnya serta menyumbang kepada pembangunan sektor kewangan Islam dan sektor utama lain. Kami percaya kerjasama ini dapat memperkukuh semangat tanggungjawab bersama dalam komuniti takaful," katanya.

Pemilihan penerima biasiswa adalah berdasarkan prestasi akademik, keperluan kewangan dan

aspirasi masa depan. Bahagian IEF akan bertanggungjawab menilai calon, menyediakan bimbingan akademik serta memantau perkembangan penerima sepanjang tempoh pengajian.

Pelajar yang layak dan sudah menerima tawaran kemasukan ke UIAM bagi kursus berkaitan digalakkan memohon melalui Bahagian IEF atau melayari www.aia.com.my untuk maklumat lanjut.